



**Komunikadu Imprensa**  
**Munisípiu Aileu**  
**Dezembu 2017**

**Komunidade Suku Açú-Mau preokupa no konfuzaun ho ezbosu Lei Anti-Korrupsaun ne'ebé kaduka iha Parlamentu Nasionál durante terseiru lejislatura**

Iha Tersa-feira, 19 Dezembu 2017, Judicial System Monitoring Programme (JSMP), realiza treinamentu iha suku Açú-Mau, Postu Administrativu Remexio Munisípiu Aileu. Partisipante sira hosi treinamentu ne'e mai hosi líder komunitáriu no komunidade sira ho total partisipante na'in 32 kompostu hosi feto na'in 9 no mane na'in 23.

Objetivu prinsipál husi treinamentu ida ne'e mak atu habelar informasaun ba komunidade liu-liu líder komunitária sira hodi hasa'e sira-nia koñesimentu kona-ba demokrásia, kna'ar órgaun soberania sira-nian no partisipasaun públiku iha prosesu halo lei no asesu ba justisa formál iha Timor-Leste.

Durante treinamentu ne'e, partisipante sira preokupa no kestiona tanba-sa deputadu sira la aprova ezbosu Lei Anti Korrupsaun ne'ebé importante tebes. Tuir sira ho lei ne'e bele salva no asegura povu nia riku-soin husi korrupción sira. Partisipantes sira mós husu ba JSMP atu hato'o sira nia preokupasaun hirak ne'e ba deputadu sira iha Parlamentu Nasionál atu bele hamoris filafali ezbosu lei refere hodi bele aselera nia prosesu diskusaun to'o nia aprovasaun.

“JSMP konsidera ezijénsia komunidade sira-nia ne'e importante tebes ba Parlamentu atu bele haree hikas fali ezbosu lei ne'e hodi diskute no aprova lalais atu bele haforsa servisu autór judisiáriu sira-nian iha kombate korrupsaun.”, dehan Diretór Ezekutivu JSMP, Luis de Oliveira Sampaio.

Hatan ba kestaun ne'e, JSMP hato'o ba komunidade sira katak ezbosu lei refere la konsege hetan aprovasaun iha III Lejislatura nia tempu tanba entre deputadu sira iha momentu ne'eba la iha konsensu hamutuk kona-ba kazu kestaun no prinsipiu sira balun relasiona “*pengujian terbalik*.” Aleinde ne'e mós iha razaun sira seluk kona-ba limitasaun tempu ba sira atu diskuti lei ne'e prezisa tempu atu diskuti ho profunda tanba ne'e ezbosu lei ne'e sai kadukadu.

Iha enseramentu, xefe suku konsidera materia treinamentu ne'e importante tebes ba povu atu hatene no órgullu tebes ho JSMP hanesan NGO ne'ebé naran bo'ot tebes iha Timor bele realiza nia atividade iha nia suku pela primeira-ves. Tamba ne'e nia dehan katak nia liman nakloke ba JSMP atu bele kontinua hala'o tan planu treinamentu iha tempu tuir mai iha sira nia suku ho loron ne'ebé sufisienti hodi komunidade sira bele partisipa hotu iha treinamentu refere.

Atividade ne'e realiza tanba hetan apoiu finanseiru hosi Governu Timor-Leste liu husi Fundu Gabinete PM ba apoiu ba Sosiedade Sivíl.

Atu hetan informasaun kle'an favór kontaktu:

Luis de Oliveira Sampaio

Diretór Ezekutivu JSMP

Telefone: 3323883 | 77295795

Website: [www.jsmp.tl](http://www.jsmp.tl)

E-mail: [info@jsmp.tl](mailto:info@jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPtl